

الثلاثاء 18-05-2010

991- التدريب عن بعد : الإشراف على العلاج النفسى (92)

"صعوبة علاقات"، و"هرب من الواقع"، و"استسهال التخلّي"

أ.مختار ماجد: .... هي ست عندها 41 سنة، بقالها معايا حوالى 3 سنين، مطلقة، عندها ولد وبنت، البنت عندها حوالى 11 سنة، والولد عنده 8 سنين

د.يحيى: بتشتغل ؟

أ.مختار ماجد: هي ما بتشتغلش، هي ربة منزل واللى بيصرف عليها اخواتها، أختها أساسا، أصل اختها تعتبر يعنى غنيه، جوزها غنى مستريح بزيادة خالص

د.يحيى: مطلقة بقالها قد إيه؟

أ.مختار ماجد: بقالها حوالى 5 سنين

د.يحيى: مطلقة ليه؟

أ.مختار ماجد: اتطلقت بعد ما اكتشفوا إن جوزها نصاب وحرامى، عليه شيكات، وأحكام قضايا وكده، فاخواتها طلقوها منه، وكمان هي عندها مشكلة بالنسبة لصحتها، حاجة كده فى القلب، يعنى هي كانت عملت عمليه فى القلب وكده، وماشيه على دوا قلب طول الوقت

د.يحيى: بتيجى كل اسبوع ؟

أ.مختار ماجد: آه، منتظمة، بتيجى كل اسبوع

د.يحيى: 3 سنين، وبتيجى كل اسبوع ؟

أ.مختار ماجد: فيه فترات كانت بتقطع، بس يعنى تقريبا هي منتظمة 3 سنين، كان فيه فترات دخلت فيها المستشفى، بس انا خدتها من بعد ما دخلت المستشفى، ودخلت معنا الجروب (العلاج الجمعى)، أنا والدكتور أحمد فى العيادة.

د. يحيى: بتاخذ دوا؟

**أ. مختار ماجد:** لأه، دي مشكلة برضه، أولا: هي فضلت فترة طويلة مافيش أدوية خالص، وكان دايمًا فيه خناقه حوالين الموضوع ده

**د. يحيى:** فيه دكتور بيشفها معاك؟

**أ. مختار ماجد:** آه، دكتور أحمد، هي كانت معانا في الجروب، ما انا باعمل جروب مع د. أحمد

**د. يحيى:** قعدت في الجروب قد إيه؟

**أ. مختار ماجد:** قعدت في الجروب 4 شهور، بس رفضت تكمل، فالدكتور أحمد شاف إنها تكمل معايا فردى طول الفترة دي، وهو كان بالنسبه ليا مرجعيه في الدواء، وفي المستشفى كنا بنشوفها سواء، وخصوصا بعد ما دخلناها آخر مره

**د. يحيى:** هي دخلت المستشفى كام مره؟

**أ. مختار ماجد:** كانت دخلت المستشفى هنا مرتين ودخلت مستشفى د. عادل صادق مره قبل كده

**د. يحيى:** السؤال بقي؟

**أ. مختار ماجد:** ان هيه جت من أربع شهور رفضت الأكل خالص

**د. يحيى:** آخر مره دخلت المستشفى إمتى؟

**أ. مختار ماجد:** من سنتين

**د. يحيى:** وبعدين؟

**أ. مختار ماجد:** قعدت أشوفها، وبعدين الجروب، وبعدين رجعت فردى، وماشى الحال لحد ما رفضت الدوا نهائى، فوصلنا لاتفاق إنها تاخذ حقنة كل أسبوعين، وكده، ومشى الحال نص نص، بس الفترة اللي فاتت دي من اربع شهور، بدأت ترفض الأكل خالص لدرجه إنها خست جامد، يعنى كانت هي وزنها أصلا قليل، 55 كيلو، نزلت حوالى 7 كيلو

**د. يحيى:** ياه !! بقت كام؟

**أ. مختار ماجد:** بقت حوالى 49 كيلو

**د. يحيى:** طولها كام؟

**أ. مختار ماجد:** طولها مثلا 160 - 165سم، حاجة كده، ما هي رفضت الأكل لفترة طويلة، ورفضت تاخذ دوا القلب كمان، ورفضت تاخذ أى حاجه تعيشها، زى ما تكون تقريبا قررت إنها تموت، حاجة كده، فأنا بعد كده قلت لأختها ان هي تخش المستشفى، هي رفضت وهما اترددوا، قالوها طب تقعدى عند مامتك، قعدت عند مامتها وبعدها رجعت قعدت لوحدها وابتدت تاكل.

**د. يحيى:** طيب ما هو كويس اهه

**أ. مختار ماجد:** لكن بصيت لقيت فيه قرار تاني خالص ان هيا حاتتخلي عن مسئولية الاولاد، مش عايزه مسئولية الأولاد خالص، وحاسبهم، واعملا فيهم الى انتم عايزينه

**د. يحيى:** إيه ده !!؟

**أ. مختار ماجد:** ما انا برضه اتخضيت، أنا مزنوق في كده دلوقتي

**د. يحيى:** وبعدين ؟

**أ. مختار ماجد:** هي دلوقتي اللي بتقول انا عايزه اخش المستشفى، ولما بارفض وأنبها إن حالتها ماتستاهلشي، أو إننا يعني حانعمل إيه أكثر في المستشفى؟ تقول طيب ودون دار مسنين، أفكرها بسنها تقول دى شهادة الميلاد بس اللي بتقول كده.

**د. يحيى:** ده كلام مهم فعلا يا مختار

**أ. مختار ماجد:** فادلوقتي انا مش عارف اضغط عليها بإيه، هي كانت بتخاف من دخول المستشفى جدا، دلوقتي مش زى قبل كده ، دلوقتي مافيش مشكلة عندها إنها تخش المستشفى في سبيل ان هي ماتربيش الولاد

**د. يحيى:** دى الحكاية وسعت قوى، طيب السؤال بقى واحدة واحدة؟

**أ. مختار ماجد:** أولا انا هل أدخلها المستشفى ولا لأ ؟

**د. يحيى:** لأه ، السؤال التاني بقى؟

**أ. مختار ماجد:** تاني حاجة: هل أضغط عليها إن هي ترجع لأولادها ؟

**د. يحيى:** هما اولادها مع مين دلوقتي؟

**أ. مختار ماجد:** ولادها أساسا عند خالهم بس خالهم ده مش مستقر، فبين خالهم وخالتهم

**د. يحيى:** بتقعد معاها 50 دقيقة كل جلسة؟

**أ. مختار ماجد:** عادى طبعاً، 50 دقيقه آه

**د. يحيى:** وهي بتقول إيه لما بتقترح عليها تلم عيالها، وتقعد معاها

**أ. مختار ماجد:** مش كده، أنا نفسي مش عارف إيه اللي أصلح للأولاد، يعني هل هي تصلح دلوقتي مع الرفض ده، والحالة كده، إنها تربي الأولاد دول؟ أنا حاسس إنها طول الوقت بتأذيهم

**د. يحيى:** واذا مارجعتشى يعنى، هي دى مش أذية برضه

**أ. مختار ماجد:** ما هو انا مزنوق عشان كده

**د. يحيى:** الولاد قلت لى سنهم كام ؟

**أ. مختار ماجد:** 11 و 8

**د. يحيى:** إيه موقفهم من امهم؟

**أ. مختار ماجد:** الولاد ملهين مع عيال خالهم وخالتهم، والناس دول بصراحة مش مقصرين، بس حاسس إنهم مركزين على الوفاء بالتزامهم بالصرف والفلوس أساساً، يعنى دروس، مش دروس، إنما مش واخدين بالهم من أى حاجة تانية .

**د. يحيى:** لما بيقعدوا مع امهم بيبقى شكلهم إيه، ولما بيقعدوا مع خالهم بيبقى شكلهم

**أ. مختار ماجد:** بيتهيل لما بيقعدوا معها بتبقى الحياة مستقرة أكثر، يمكن من غير ما تقصد، بيبقى ماشى الحال، هى بتبقى منظمة وكده لما بتكون ملمومة ، لكن لما الحالة بتتقلب، بيبقى فيه عياط وخناق وبهدله، وخالتهم بتاخذهم الفترة دى

**د. يحيى:** مدارسهم ماشية؟

**أ. مختار ماجد:** ماشية، ماهى مدارس خاصة وكده

**د. يحيى:** فيه تاريخ عائلى للأمراض بتاعتنا؟

**أ. مختار ماجد:** فيه حاجة أنا عرفتها مؤخراً كانت حصلت زمان، إن أمها، أم المريضة يعنى، كانت فى سن كده معينه زمان طفشت برضه من ولادها ومن جوزها وراحت اسكندريه، واختفت، واتجوزت، وماعرفوش عنها حاجه إلا من 7 - 8 سنين

**د. يحيى:** ليه عرفت ده متأخر كده يا شيخ!!!

**أ. مختار ماجد:** أنا عرفته من بدرى، بس ماكنتش متصور إن له أهمية كبيرة، بس دلوقتى يتهاى لى إن فيه حاجة كده فى العيلة يمكن تسميها " التخلى" مثلاً أو حاجة كده، هى عموما والديها رجعت، بس مش بخطرها قوى، هما جابوها وقعدوها فى شقه هنا فى مصر

**د. يحيى:** بصراحة الأمور مش واضحة قوى، مش ده حالة أم العيانة بتاعتك دى وصل إلى درجة مرض نفسى يا بنى، مش مجرد تخلى وزعل وخصام كلام من ده

**أ. مختار ماجد:** أظن كده، وده بيخلى الحالة تبقى أصعب، وأصعب؟

**د. يحيى:** بصراحة آه، ودلوقتى أنا باراجع نفسى، مش عارف عيانتك دى اطلقت عشان جوزها حرامى زى ما قلت لنا فى الأول، ولا عشان إن عندها صعوبة شديدة فى إنها تعمل علاقة من أصله مع أى "آخر"، سواء جوزها، أو عيالها، أو غيره

**أ. مختار ماجد:** أظن هي اتطلقت عشان ده وده مع بعض، جوزها فعلا مش تماما، أثناء ما كان معاها كان اختها وجوز اختها بيصرفوا عليهم برضه، وهو كان بياخد الفلوس منها، وكأنها حقها، ومع ذلك هوه عايز يرجع لها دلوقتي

**د. يحيى:** وهى دخلت المستشفى أول مرة قبل ما تتطلق؟

**أ. مختار ماجد:** آه ، دخلت المستشفى بعد العملية وكده، بعد عملية القلب، قبل ما تتطلق

**د. يحيى:** بصراحة، مره تانيه هيه حاله من أصعب ما يكون، عايزالها كام "فرض" كده، كل واحد لوحده، وبعدين نحاول نلضمهم في بعض، بس دلوقتي من الناحية العملية هي دي حالة تستحمل تقعد تتكلم في ده وغيره 50 دقيقه كل اسبوع لمدة 3 سنين؟ ولا هي محتاجة أكثر لعملية تأهيل ومتابعة دقيقة من خلال العلاقة العلاجية دي، طبعا كتر خيك إنك صبرت عليها ثلاث سنين، وما دخلتشي المستشفى السنين الأخرانيتين، بس باين إن الحالة مش ماشية، وإن الأعراض عمالة تتقلب بين وشمال وبس، بس كويس إن لسه فيه علاقة معاك يمكن نقدر نعمل حاجة من خلالها.

**أ. مختار ماجد:** ما هو مافيش بديل قدامي، المستشفى وهى عايزة تخش، هربا يعني زى ما حضرتك شفت، يبقى ما عادتشى وسيلة ضغط، يعني مافيش أى حاجه أعرف أضغط بيها عليها عشان تنفذ برنامج التأهيل اللي حضرتك بتشاور عليه.

**د. يحيى:** ماشي، باقول لك كتر خيك، أنا ما عنديش اعتراض معين، هي حالة صعبة على أى واحد، وإنك تقعد معاها المدة دي كلها، نحاول تلمها وتصلح الممكن، ده شيء مش شوية، 3 سنين ده وقت مش قليل، واحنا لسه كده "مملك سر" أو حتى راجعين لورا، وبعدين إنت عملت شغل تاني كويس اللي هو إنك انت يعني بقيت تستشير زميلك الطبيب الدكتور أحمد أول بأول، خصوصا إن باين فيه خطر على نفسها، مش بس على عيالها، يعني قلة أكلها وسرعة خسائها دول إنذارات مهمة، وبرضه تخليها عن عيالها بالصورة دي حاجة صعبة خالص، مع إن الظروف بره شكلها معقول من ناحية إن اختها ما اتخلتشي عنها ولا عن ولادها، وجوز اختها مش ملزم، وبيصرف بطيبة وكرم زى ما بلغتنا، إنت عرضت حاجات كتير مع بعض كلها صعب بصراحة، أولادها، ووزنها، ووحدها، وقلة شغلها، ورفضها الحياة، ومحاولة الهرب للمستشفى أو لبيت مسنين، كل ده داخل في بعضه بشكل صعب يا ابني، عندك حق.

**أ. مختار ماجد:** طيب دلوقتي أنا أعمل إيه؟ أكمل ازاي؟ أبدأ منين؟ والأمور عايزة شغل في كل ناحية؟

**د. يحيى:** عندك حق، بس تبدأ إيه، ما انت بدأت بقالك ثلاث سنين، أنا رأيي إن الصعوبة بدأت من امها، وانت عارف علاقتي بالوراثة إيه، إحنا مش بنورث مرض معين، إحنا بنورث برامج معمولة من مئات، وساعات آلاف السنين، باين إن برامج

"صعوبة العلاقات البشرية" بتظهر في تنويعات وأشكال وألوان حسب الظروف المتاحة، ويتوصل طبعاً لحد المصائب والأمراض إذ ما كانتى تلاقى ظروف في التربية واجتمع تلملمها وتوجهها، إنت قلت هنا إنك حسيت زى ما يكون فيه ميل حاجة اسمها "التخلى"، ظهر عند أمها وما عندناش تفاصيل عن مساره لمدة مش قليلة، سبع عن سنين أو أكثر، ولا احنا عارفين تفاصيل عن مآله، لأنك ما قلتش لنا هى أمها وهى قاعدة لوحدها دلوقتى عاملة إيه، وعلاقتها بيها إيه وكلام من ده، إنت لازم تبحث الموضوع ده لو سمحت، لازم نعرف أكثر، عشان نتحمل المسئولية أكثر.

الست دى بتتخلى عن عيالها زى ماقلت، لكن أنا ما اقدرشى اعتبرها اتخلت عن جوزها في حدود المعلومات اللى انت قلتها، الظاهر كان فيه عيوب مش قليلة، لا يمكن التعايش معها من واحدة عادية، فما بالك بواحدة هشة وهراثة بالشكل ده، لكن بالنسبة لأولادها فيه تخلى يعنى فيه تخلى، ومش مفهوم قوى، ما هو احنا ما نعرفشى عمق العلاقة بين الأهل والأولاد خصوصاً في الطبقة المتوسطة دى، احنا بنبص للأهل من بعيد وبنحكم على علاقتهم بأولادهم بأحكام ظاهريه وخلص، إنما الظاهر إن فيه علاقات أكثر بدائية وقوة من الأعراض والأمراض والخطر والكلام ده، إحنا بنشوف النتائج وتحكم، أما طبيعة العلاقة وعمقها البيولوجى، وتوظيفها، وهوه هوه النفسى حسب فكرى، وتشكيلاتها، وتغرياتها فأظن دى منطقة لسه مش في متناول العلم بالشكل الكافي في مرحلة المعرفة الحالية، يعنى كل اللى بنشوفه إذا كان الأولاد ماشيين في المدارس ولا لأه، بيلعبوا ولا لأه، وكلام من ده، لما بينجى بقى وتلقى غريزة أصيلة زى غريزة الأمومة انضربت، ولو في الظاهر بالشكل ده، نقف ونستغرف، هو إيه اللى حصل بالطبطب؟

**أ. مختار ماجد:** ما هو ده اللى خلاى مش عارف أقرر إيه الأصلح لها، وإيه الأصلح للأولاد

**د. يحيى:** عليك نور، ما هو احنا مسئوليتنا ممتدة للأولاد، وساعات بينى وبينك، بتبقى للأولاد أكثر، خصوصاً لما يكون الأم أو الأب حالتهم صعبة، او متوقفة زى الحالة دى، ما هو ربنا حايسالنا على ده، وعلى ده، أنا بيتيهياً لى إن الست دى كانت أكثر صراحة مع نفسها من أمهات كتير بيضروا أولادهم ويستعملوهم من غير ما يدروا، فيه احتمال يا ابني إنها تكون سابتهم مش تخلى، لأه، بغريزة الأمومة الأقوى يمكن هى شافت اللى انت شايفه، قصدى اللى انت حطيته كاحتمال، وقالت جوا جواها، أرحمهم منى، ثم إن المرض هنا مش صريح قوى، يعنى إنت ماقلتلاش برغم إنها دخلت المستشفى أكثر من مرة إن كانت بتشوف هلاوس مثلاً أو بتعتقد في ضلالت ولا لأه، أنا عندي خبرة إن الأولاد بيتأقلموا مع المرض الصريح بتوع أهلهم بسهولة أكثر من حساباتنا، لأن ده بيبقى واقع آخر بيتعاملوا معاه بطريقة أو بأخرى، ما دام بيهجمشى عليهم ويأذيمهم، أو يقف في طريقهم ويعطلهم، يعنى العيال بيشوفوا

أهم ولا أبوهم وهو بينام ويصحي، ويقعد معاهم ويروح دورة الميه وياكل ويشرب، وبعد كده مش مهم إن كان بيشفو هلوسة ولا لأه، الست دى ما عندهاش كلام من ده، يمكن عندها ما هو أخطر، ويمكن سابت العيال رحمة بيهم، ده مجرد احتمال تحطه في الاعتبار

**أ. مختار ماجد:** يعنى أحسن ماترجعشى للأولاد؟

**د. مجي:** ماتتسرعشى كده، أنا باقول احتمالات، ثم إن المسألة مش في إيدنا قوى زى ما انت عارف،

**أ. مختار ماجد:** طيب والدوا؟

**د. مجي:** لا ، الدوا ده مهم جدا حتى من غير هلاوس ولا ضللات ولا كلام من ده، بس لازم يتظبط أول بأول مع مسيرة العلاج، يعنى مش مجرد تمهيد وخلص، لأه، إحنا ندى الدوا في الحالات دى زى ما انت عارف عشان نهدي المستويات الأقدم اللى بتنشط بعيد عن الواقع، وتعرض أو تفرض حلول بدائية، وبعدين أول ما نتظمن إن الدوا حد من النشاط البدائى ده احنا نقدر نشغل المستويات الأحدث بتاعة الواقع والعلاقة بالموضوع، وده يسمح لنا إننا نخف إيدنا ونقلل الدوا والكلام اللى انت عارفه ده، برغم إنك مش طبيب، وده طبعاً باستشارة د. أحمد زميلك طول الوقت لأنه هوه أدري بيها من، مش هو كان زميلك في الجروب لما كانت معاكم؟

**أ. مختار ماجد:** أيوه

**د. مجي:** وبالإضافة لكده ، أنا موجود، واحنا كلنا موجودين أهه

**أ. مختار ماجد:** يعنى تقعد تاخد دوا لمدة قد إيه؟ خصوصا وهى مزرجنة بالشكل ده؟

**د. مجي:** لأبقى، مزرجنة، مش مزرجنة، الدوا ضرورى، وده بيحميها من إنها تخش المستشفى

**أ. مختار ماجد:** ما هو المصيبة إنها عايضة تخش المستشفى

**د. مجي:** آه والله، مصيبة فعلا، هى معاها شهادة إيه؟

**أ. مختار ماجد:** بكالوريوس كلية نظرية

**د. مجي:** طيب ما فكرتش إنها تشتغل بقى، ولو بالتدريج، بتدريج التدريج يعنى

**أ. مختار ماجد:** فكرت، وعرضت عليها، لكن المقاومة كانت فظيعة، لدرجة إنى حسيت إن الدعم المادى بتاع أختها وجوز أختها خلوها تريح على كده، وما تخش إنها مضطرة تشتغل أكل عيش، لا عشانها ولا عشان أولادها.

**د. مجي:** أظن عندك حق، بس من خلال العلاقة اللى بينك وبينها، اللى استمرت ثلاث سنين عاخلوة والمره، أو على المره

والمرّة، ممكن تلاقى سكة توصل لها إن الشغل دلوقتى ماعادشى أكل عيش وبس، ده مواعيد، وعلاج، ومجتمع، وكرامة وكلام من ده.

### أ.مختار ماجد: يا ريت

د. يحيى : ياريت إيه يا جدع انت، إنت قدها وقدود إن شاء الله،

### أ.مختار ماجد: والأولاد

د. يحيى: لا، أظن تستنى شويتين على الخطوة دى، أعتقد إن هى لو اشتغلت يمكن الأمور ترجع طبيعية شوية شوية، وبعدين خلى بالك اللى عملوه اختها وأخوها للأولاد مش شوية، دى من الحاجات الرائعة فى مجتمعاتنا، دول لو فى بلاد بره مش حايلقو حد يلهمم كده، صحيح فيه مؤسسات حكومية بتحمى الأولاد من أهلهم وكلام من ده، لكن لأه، هنا حاجة تانية تلقائية وشريفة ومهممة بصراحة، وبعدين إحنا عايزين معلومات أكثر وأكثر عن "التخلى" بتاع امها ده، يعنى ده لما حصل كان هى فى سن كام، وعملت إيه، وإيه اللى فاضل من ده دلوقتى عندها، وإيه وجه الشبه بين التخلى ده، والتخلى بتاع أمها، مش كده ولا إيه؟

أ.مختار ماجد: آه طبعاً، بس الظاهر أنا مادقيتشى كتير فى التفاصيل عشان كنت حاسس إن مهما حصلت على معلومات، هى معلومات تاريخية، يعنى مالهاش نتيجة ممكن أستغلها لصالح الموقف الحالى يعنى

د. يحيى: إيش عرفك؟ إنت ماتعرفشى إيه المعلومة اللى تقدر تستغلها، وإيه المعلومة اللى مالهاش فائدة، يمكن فيه معلومات تفتح نفسك، وتخليك تصبر وتحسبها أصح

### أ.مختار ماجد: يا ريت

د. يحيى: شوف اما أقول لك، المعلومات مش فرجة، ولا فك عقد، دى زى دراسة طبيعة المواد الأولية اللى حانعيد بيها البناء، إذا كان صالح للإعادة، أو على الأقل نعمل حسابها واحنا بنرممها.

### أ.مختار ماجد: إزاي؟

د. يحيى: لأه بقى، مش إزاي، المسألة مش نعمل كذ بالمعلومة الفلانية تحديداً، آه دا ممكن، لكن فيه حاجات بتخش جونا كعمالين وبعدين تطلع لما نعوزها، بصراحة الحالة صعبة، وأى جهد فى أى اتجاه يمكن ينفج، يعنى انت مثلا ما قتلناش كفاية عن الكام سنة اللى عاشتهم مع جوزها النصاب كانوا فيهم إيه، صحيح إنت بتأخذ المعلومات من مصدر واحد مشكوك فى مصداقيته، إنما تشوف هى استحملت قد إيه، وابتدت ترفض إمتى، والأهل هما سبب الطلاق فعلا ولا هى اللى طلبت وهما ساعدوها، وكده



**أ. مختار ماجد:** وده حايفيد في إيه؟

**د. مجي:** يا ابن الحلال، مش احنا قدام "صعوبة علاقات"، و "هرب من الواقع"، و"سهولة تخلى"، يبقى أى دراسة لأى علاقة مع آخر، أو مشروع آخر، حاتفيد تعرف قواعد النجو بتاع الست دى وهى بتعمل العلاقة العلاجية اللى هى تمهيد للعلاقات الطبيعية، كل ده مهم جدا، وصعب برضه.

**أ. مختار ماجد:** طيب وفضل أقعد معاها مرة كل أسبوع ساعة برضه ؟

**د. مجي:** مش احنا قلنا حالا إن الست دى عايزة تأهيل منتظم أكثر ما هى عايزة كلام وحديث، يعنى إنت دلوقتى متأكد إن فيه علاقة معاك، وعلاقة طيبة، والعلاقة دى هى اللى خلقتها تيجي ثلاث سنين بانتظام تقريبا، وأظن برضه هى اللى خلقتها ماتدخلشى المستشفى، يبقى آن الأوان إنك تستغل العلاقة دى في العمل على تخطيط برنامج تأهيلي هادى محكم متواصل، أنا باعملها حتى مع العواجز بالقلم والورقة، باكلف أولادهم إن النوم يبقى في نفس الميعاد، والغطار في نفس الميعاد، واخروج ما اعرفشى إيه، والزيارات، وأنا قلت لكم الكلام ده ييجي مليون مرة، وكل ما كانت العلاقة وثيقة وطويلة، تلاقى التعليمات بتوصل أحسن، ده اللى ساعات باسبه "الضغط الحب".

**أ. مختار ماجد:** يعنى أبطل أقعد معاها ساعة

**د. مجي:** أظن آه، بس بالتدرج، لأنها اتعودت على حكاية الخمسين دقيقة دى، وعلى الحكى، والكلام ده، خليها يا أخى نص ساعة، أو تلت ساعة وتلت ساعة مرتين في الأسبوع، ويستحسن يكون حد من أهلها الطبيين دول معاها عشان هما اللى حاينفذوا كثير من التعليمات، وإنت تعلمهم حكاية "الضغط الحب"، دى، ولو انها بينى بينك صعبة، يعنى سهل إنك تقولها، لكن وانت بتننذها لازم تنسى التعبير ده، أحسن يعنى، إنت تعرف على إنك بتعمل "ضغط حب" من النتائج مش من إنك تقوله كشعار، أنا ساعات لما باغلط واقول حاجة زى كده لعيان، يا إما ينسى "الضغط"، يا ينسى "الحب"، أى والله، لكن لما بيوصل المحتوى أثناء الشغل، بتبقى الأمور حاجة تانية.

**أ. مختار ماجد:** في ظل إن هى دلوقتى رافضه الاولاد ومتخليه جدا لدرجة ان هى عايزه تخش المستشفى عايزه تروح دار المسنين اضغط إزاي؟

**د. مجي:** انت طلعت جرد انك انت ما استسهلتش دخولها المستشفى، لكن مش معنى كده إن دخول المستشفى مالوش فائدة على طول الخط، لو كان وصلك حاجة جديدة من العرض النهارده، لو عايز حد يساعدك وانت بترسوم خطة التأهيل بدل الاقتصار على العلاج الكلامي، يمكن دخولها المستشفى لفترة قصيرة يكون إعلان لتغير طريقة العلاج، ونوع المتابعة، ويمكن

برضه هي بنفسها تلاقى إن المستشفى ما هياش حل، وحتى ماهياش مهرب، لأنها فترة مؤقتة بطبيعتها، وبعدين بيني وبينك، يمكن تفكر بعد دخولها المستشفى إنها ترجع الجروب، أنا مش فاهم إنت رضيت إنت والدكتور أحمد إنها تنقطع عن الجروب ليه؟

**أ. مختار ماجد:** هي اللي رفضت خالص

**د. محيي:** ما هو ده له دلالتة برضه، لأن الجروب امتحان علاقاتي أكبر بكثير

**أ. مختار ماجد:** يعني نرجعها الجروب؟

**د. محيي:** حا ترجعها إزاي في الظروف دي، هوه بالعافية، واحدة واحدة، حسب خطة التأهيل الجديدة، سواء بعد دخول قصر للمستشفى، أو بدونه، وأنا شايف إن التلات سنين اللي فاتوا دول ما راحوش هدر بصراحة

**أ. مختار ماجد:** على الله

**د. محيي:** كله على الله، إحنا نعمل اللي علينا، وبرضه كله على الله.